



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

tiryimiyim@aolima

tir yimiyim

TAPAK 7



Israel PM Naftali Bennett-i India semdangtsü aliba thinen



PM Modi-i MP nung ki lakh 5.21 semzüksü

VOL. XIX NO. 166 (ADOK 166) DIMAPUR RASEMNÜ (WEDNESDAY) METSÜREMI (MARCH) 30, 2022

₹ 5.00

NATO summit nung Ukraine jaoker Russia-i mitkar maparen kanga ajemogo

New Delhi, March 29, 2022 (Agencies): North Atlantic Treaty Organisation (NATO) indang summit nung Ukraine adentsü jaokogo.

April 6 aser 7 anogotem Belgium kübok Brussels nung NATO summit amongtsü.

NATO summit nung Ukraine dak alia non-member state jaok aser itemji Georgia, Finland, Sweden, Australia, New Zealand, Japan aser South Korea lir ta osang ajanga ashi.

Külen, Mongulbarnü Turkey nung Ukraine-i Russia den yimjung olemtep alidang onük aika lemsatopogo.

Ukraine-i ashiba onüktem

rongnung parnoki NATO züngsem akümtsü merangba anentsüba lir.

Ukraine-i West dangi nungi security guarantees aginür ta ashi.

Maneni, tanü olemtep aliba sülen Russia-i Ukraine kübok Kiev aser Chernigov nung mitkar maparen ajemogo.

"Kiev aser Chernigov nung mitkar maparen kanga ajemtsü telemtetba agiogo" ta Russia Deputy Minister of Defense Alexander Fomin-i ashi.

"Ukraine-i Geneva Conventions sülen anidaktsüla aser iba nung prisoners of war dang taochi sayutsüba dena lir" ta Fomin-i ashi.

Chümoukedima DC ajanga metetdaksür

Dimapur, Metsüremi/March 29 (TYO): ARTC Shokhuvi tesülen apu yangluba tekeraba nung renemtsü mechi ARTC Shokhuvi aser Pimla Bazaar Junction tsüngta lenmang March 30, 2022 (Bodhbar) nü nungi tenzüka ita ka atema shibanga atatsü, ta Deputy Commissioner,

Chümoukedima, Abhinav Shivam, IAS ajanga sangdong ka nung metetdaksü.

Anungji nüburtem dang tarutsü nung osang ka magütsü tashi Shokhuvi Gate - Vidima - Razaphe - Shitovi - Mhaikam - Pimla Bazaar Junction lenmang nung jaja atatsü metetdaksür, ta sangdong ajanga ashi.

Anogo 8 nung totzü jenjang tenetben tuogo



Services ajanga metetdaksü.

Uttar Pradesh, Punjab, Uttarakhand, Goa aser Manipur nung assembly elections agitsü aliba ajanga totzü jenjang matu.

"Crude barrel ka nung \$100-120 tashi agi aliba nung ajemdaker totzü company temi diesel litre nung Rs 13.1-24.9 aser petrol litre nung Rs 10.6-22.3 shi atutsüsa akümtsü" ta Kotak Institutional Equities-ia ashir.

New Delhi, March 29, 2022 (Agencies): Tesüiba anogo 8 tsüngda India nung totzü jenjang tenetben tashi tuogo. Totzü company temi Mongulbarnü petrol litre nung poisa 80 aser diesel litre nung poisa 70 atu.

Tanü nungi Delhi nung petrol litre nung Rs 100.21 aser diesel litre nung Rs 91.47 kümogo.

Külen, Mumbai nungbo petrol litre nung Rs 115 aser diesel litre nung Rs 100 tera agi dang majung kümogo.

Election mapang petrol aser diesel jenjang matuba ajanga state retailers-i revenue \$2.25 billion (Rs 19,000 crore) shi akoksaogo ta taoba hopta Moody's Investors

"Crude oil barrel ka nung \$100 agi alitsüsa kümra retail price nung litre shia nung Rs 9-12 shi atutsüsa akümtsü. Ano crude oil barrel nung \$110-120 kümra, totzü litre shia nung Rs 15-20 shi atutsü" ta CRISIL Research-ia metetdaksü.

Centre sorkar meyong totzü company tem- Indian Oil, Bharat Petroleum, aser Hindustan Petroleum-i anogoshia international markets nung crude oil jenjang nung ajemdaker totzü jenjang repringshimer.

Petrol aser diesel nung temelenshi kar lira anepdang shia 6:00 ako nungi jenjang tasenba benshir.

COVID-19 Nagaland: 4 dak putet, 5 taneptsü angu & 1 asü

Kohima, March 29, 2022 (TYO): Nagaland nung Mongulbarnü nisung 4 dak COVID-19 putet, 5 taneptsü angu aser 1 asü.

Tanü puteter, taneptsü angur aser tasür ajakji Dimapur nung dang liasü.

Nisung 35,474 rongnungi

33,217 taneptsü nguogo aser ibaji taneptsü angur 93.64% lir.

Nagaland nung tang nisung 14 anepaludar saka parnok ka dak dang shirangba yimya lir.

Tanü tashi nung COVID-19 puteta alir nisung 759 süogo saka parnok 4 tashi tanga tashidak ajanga asü.

Assam aser Meghalaya tsüngda arrtsülen tesem 6 angatetteptsü



March 29, 2022 nü New Delhi nung Union Home Minister Amit Shah lia Assam CM Himanta Biswa Sarma aser Meghalaya CM Conrad Sangma nati tenangzüktep nung sign asüba sülen agiba noksa angur.

New Delhi, March 29, 2022 (Agencies): March 29, 2022 ya Northeast atema otsüsüsü anogo ka lir kechiyong tanü Assam aser Meghalaya chief minister temi küm 50 shi atsütepa aruba arrtsü ken o angatetteptsü atema tenangzüktep agiogo.

Mongulbarnü New Delhi nung Union Home Minister Amit Shah lia Assam CM Himanta Biswa Sarma aser Meghalaya CM Conrad Sangma nati tenangzüktep nung sign asü.

"Tanü ya Northeast atema otsüsüsü anogo ka lir. 2014 nungi Narendra Modi-i aniba sorkari

Northeast nung yimjung aser terenlok atema inyaka arur" ta Amit Shah-i ashi.

"Yaküm July ita ni Meghalaya nung Northeast nungi chief minister tem den ajurutep aser parnok dang arrtsü ken o tem angatetteptsü mepishi. Mapang tatsüka tsüngda Assam aser Meghalaya tsüngda iba tenangzüktep agiba atema ni kanga pelar" ta paisa metetdaksü.

Yaküm July ita nungi Assam CM Sarma aser Meghalaya CM Conrad nati kilometer 884 arrtsü nung ken o tem angatetteptsü atema jembitepa aru.

Assam aser Meghalaya tsüngda arrtsü atema mangatettep aliba tesem 12 tashi lir aser July 2021 nung state ana nungi sorkartemi mezüngbuba shilem nung tesem 6-Hahim, Gizang, Tarabari, Boklapara, Khanapara-Pilingkata, Ratacherra angatetteptsü atema bangjemtepa liasü.

Item tesem trok ya ali tasazük 36.79 sq km shi lir aser iba nungi Assam-i 18.51 sq km aer Meghalaya-i 18.28 sq km lenzüksü.

Mongulbarnü tenangzüktep agiba sülen tanabuba mapaji sorkar anaprong nungi teshimtet nübotem dena Survey of India (SoI)-i arrtsü ladangtsüba lir. Iba sülen Parliament dangi temelaba meshia abentsü.

British nungeri yimsüsüba mapang Assam nung Nagaland, Arunachal Pradesh, Meghalaya aser Mizoram dena liasü saka India nüjiso anguba sülen item ajak ya state balala aküm.

Meghalaya ya 1972 küm Assam nungi state ka aküm saka parnoki Assam Reorganisation Act, 1971 magizüker aser iba jagi arrtsü mangatettep adoka lir. Assam aser Meghalaya tsüngda kilometer 884 agi arrtsütepa lir.

ABDM Nagaland-i anogo ananü workshop agi

Kohima, March 29, 2022 (TYO): Ayushman Bharat Digital Mission, Department of Health & Family Welfare Nagaland ajanga anogo ananü workshop ka ayonga agiogo.

Iba sentong nung state health ketdangsurtem, medical & professional councils ketdangsurtem, Chief Medical Officers, Medical superintendent aser government o private health

facilities managers aden.

Yashi aser tanü agiba workshop nung National Health Authority nungi shisalen sayurtemi Saurav Kumar aser Anubhav Puri nati Ayushman Bharat Health Account (ABHA IDs) aser health facility o health professionals registries indang tesayubatem agütsü.

Ayushman Bharat Digital Mission ya September 27, 2021 nü Prime Minister Narendra Modi-i

tenzüksü aser iba ya national digital health ecosystem ka tentettsü alizüng nung tenzü.

Nagaland nung tang tashi nung ABHA accounts lakh 2 ser meyrjang 35 tema lapoka lir, ta State Mission Director, Ajit Kumar Ranjan-i ashi.

Iba system nung Health Facilities nung registration asütsü atema Chief Medical Officer tem nodal officer inyaksü shima lir.

NSCN-i UNPO ketdangpur tasen nem tenüngsang agütsür

Dimapur, March 29, 2022 (TYO): Dr. Edna Adan Ismail (Somaliland)-i Unrepresented Nations and Peoples Organization (UNPO) President inyaksü shimba atema Nagalim tenüng nung National Socialist Council of Nagalim (NSCN)-i tenüngsang agütsüba metetdaksüogo.

"Onokisa Vice-Presidents - Elisenda Paluzie (Catalonia) aser Rubina Greenwood (Sind), aser Presidency members tasentem-Tammy Breedt (Afrikaners),

Dolkun Isa (East Turkestan), Paul Strauss (District of Columbia), Tina Rose Muna Barnes (Guam), Ali Abdelzadeh (Iranian Kurdistan), Alex Thach (Khmer Krom), Abdi Mahdi (Ogaden) aser Rigzin Genkhang (Tibet) nunger nem tenüngsang agütsür" ta MIP, NSCN/GPRN sangdong ka nung ashi.

Dr. Edna Adan ya UNPO nung mezüngbuba tetsür President lir aser lai Nasser Bolodai melenzüksü.

March 26 & 27, 2022

anogotem Washington DC nung XVI General Assembly alidang NSCN-ia shilem agiogo. Iba sentong nung Collective Leadership, NSCN züngsem Lt. Gen. Retd. Vs. Atem-i anir aden. Parnoki zoom/virtual meeting ajanga UNPO General Assembly nung shilem agi, ta MIP-isa metetdaksü.

January 23, 1993 nü NSCN-i Nagalim tenüng nung züngsem ka aküm. Tang UNPO nung züngsem 44 lir, ta MIP, NSCN/GPRN-isa ashi.

NFMPS-JICA indang HPC senden amen

Dimapur, March 29, 2022 (TYO): March 29, 2022 nü Nagaland Forest Management Project Society (NFMPS-JICA) indang High Power Committee senden ka menogo.

Iba HPC nung Chairman ji Nagaland Chief Secretary, J Alam, IAS lir aser pa indang Conference Hall nung sendenji amen.

"Japan International

Cooperation Agency (JICA) ya Nagaland state atema kanga dang tongtipang mapatong ka lir aser mapa takok ngua inyakba osang angashidang kanga pelar" ta Chief Secretary Alam-i ashi.

"Iba Project indang tongtipang alizüngji forest ecosystem tajungba kümdaktsütsü aser Jhum area tem nungi tajangzük angutsü

atema mapa inyaksüba lir. NFMPS-JICA indang HPC-i portal ka lapoktsüla aser iba nung osang sangdongtsüla" ta Alam-i metetdaksü.

Nagaland nung mapatongtem takok ngua inyaksü atema Department tem sendaktsütsüla, ta paisa ashi.

HPC indang senden nungsa annual work plan (FY 2022-23) benok.



National Informatics Centre, Mokokchung nungi ketdangsürtemi ADC (Planning) Conference Hall, Mokokchung nung Mokokchung Police ketdangsür nem March 29, 2022 nü iRAD (Integrated Road Accident Database) training agütsüba mapang tangokba noksa ka yangi angur.

Nagaland Tribes Council ajanga T Senka Ao nem tenüngsang agütsür

Kohima, Metsüremi/March 29 (TYO): India Tir ajanga T. Senka Ao nem March 28, 2022 nü Rashtrapati Bhavan, New Delhi nung Padmashri Award agütsüba atema Nagaland Tribes Council (NTC) ajanga tepela lemsateper, ta NTC sangdong ka ajanga ashi.

T. Senka Ao-i media literature, education aser social work tsütsü shilem tulu agiba mechi iba konang tetushi ya agütsüba. Pa ya NTC nung mezünpur aser 2013 nungi 2019 tashi teyakyak züngsem ka liasü aser NTC terenlok atema pai

yaritepba aser shilem agiba teti bilemtetsü, ta ashi. Pai iba ama takok tajung ngutetba atema NTC tejak tenteter. Kaket ken o, shisaliok aser nüburtem asoshi pai mapa balala inyakba nung Tsüngremi moajang ta sarasademtsür, ta NTC sangdong ajanga ashi

BBBP kübok Wokha nung sentong ayongzük



Dimapur, Metsüremi/March 29 (TYO): Wokha District Administration aser Beti Bachao Beti Padhao (BBBP) kübok District Level for Women- Mahila Shakti Kendra (DLCW-MSK) ajanga Saki-One Stop

Centre (OSC) den lungjemer March 29, 2022 nü District Hospital, Police Point aser NST colony Wokha town nung "Save girl child, gender equality and women empowerment" omen nung ajemdaker street play ka

sayua liasü. Iba play ya tetsür chanu kumzüka ayutsü, gender equality aser tetsürtem nem tashi agütsüba indang ka liasü aser Wokha nung aliba Lotha Naga Youtubers temi sayua liasü.

CYF ketdangsürtemi Phek district sema jaja



Chakhesang Youth Front ketdangsür aser dangartem Chetheba nung sentong ka agidang tangokba noksa nung angur.

Kohima, Metsüremi/March 29 (TYO): Chakhesang Youth Front (CYF) puri March 25 nungi 26 anogotem nung par den affiliate süa aliba unit ajunga semdanga senden mena liasü.

district-i ak shi bener aruba nokdanga aliba pangzüngtem shidak inyaktsü atema unit nem angatetdakja liasü. Iba mapang parnoki district administrative heads tem ajuru aser Chamber of Commerce & Industries ketdangpurtem den senden mena liasü.

semdang aser mozüki anepalutsü atema doctor ka kisüng aliba ajanga timtem ajuruba ajiteta Medical department dang doctor peria yoktsü shia liasü.

CYF ajanga Phek district sema jajaba mapang Chakhesang Public Organization (CPO) ajanga lipajen wazüka ayutsü aser

CYF president Vezhodüyi Nakro-isa Chakhesang lanur ajunga dang nüburtem terenlok alitsü atema lenirtem kanga shisa kaa shimtsü ayongzüka liasü.

NSCN/GPRN Konyak Region ajanga metetdaksür


Dimapur, Metsüremi/March 29 (TYO): Konyak Region indang Mon district telungzük aser temeket nung taaktsü maketba nisung kari temelaba makai NSCN/GPRN tenüng nung senotsü tenla aser teyari meshia/sarua jajaba osang angazüker, koba Konyak Region, NSCN/GPRN indang Care-taker/Chairman ajanga memetet, ta NSCN/GPRN sangdong ka ajanga ashi.

meinyaktsü metetdaksür. Tang nungi tenzüka kija mesüra shishilempar kari danga temelaba makaba nisung nem parnoki meshiba ama senotsü tsütatepba alinungbo ibaji Konyak Region, NSCN/GPRN indang Care-taker/Chairman khuret masü.

Iba dak sendakba nung Konyak Region, NSCN/GPRN indang Care-taker/Chairman, M. Sangti Konyak ajanga temelaba mali iba ama mapa

Iba ama maparen dak sendakba nung tali tejangjaba metettsü asoshi M. Sangti Konyak, Care-taker/Chairman, Konyak Region, NSCN/GPRN den mobile number 7085462482 ajanga tongteprateptsü akok, ta sangdong ajanga ashi.

FAC, Mokokchung nung Disaster Management training agütsü



Dimapur, Metsüremi/March 29 (TYO): Disaster Management Committee, Fazl Ali College, Mokokchung ajanga Fire and Emergency Services Department, Mokokchung den lungjemer Disaster Management indang Workshop cum Training sentong ka March 29, 2022 nü College Auditorium nung agia liasü.

alirtem kumzüksü yimyatem sayutsü atema sentong ya ayongzüka liasü.

Jelia osang magütsü lendong-tsüdong ajurur, anungji kaketshirtem lendong-tsüdong balala nungi kumzüka alitsü nükjidong nung iba sentong ya ayongzüka liasü.

Iba sentong nung Dr. R. Bendangtemjen menden liasü aser Principal Dr. Temjenwabang ajanga tarur pela agizükba o jembia liasü. Fire and Emergency Services Department nungi ketdangsürtem aser personnel temi kitsük-kirong mapang nüburtem kumzüka yimyatem sayua liasü.

Ajidang masü ano lendong timtem ajuruba mapang renemshia alitsü asoshi kaketshir nem angazükdaktsütsü aser ano mi lendong mapang timtem ajurua

Yirur alir nem first aid agütsütsü yimyatem kaketshir dang sayua liasü. Iba sentong sülen ano mock drill ka ayongzüka yangjia fire-extinguisher amshiyim indang kaketshir, tesayur aser non-teaching staff tem dang sayua liasü.

Kohima nung Social Health Responsibility Campaign aka

Dimapur, Metsüremi/March 29 (TYO): National Urban Health Mission (NUHM) kübok tang telidak Social Health Responsibility Campaign nung shilem ka ama CMO Office, Kohima lenisüba kübok Panchayat Hall, Upper PWD Colony, Kohima nung March 29, 2022 nü Non-Communicable Diseases

(NCD) screening sentong ka agia liasü.

AGOK züngsemtem APO Hon jubilee nung jaoker

Dimapur, Metsüremi/March 29 (TYO): Angami Gazetted Officers' Krotho (AGOK) ajanga züngsem ajunga dang Angami Public Organisation (APO) Golden Jubilee nung adentsü ayongzüka liasü, koba April 8, 2022 nü Khuochiezie (Local Ground), Kohima nung amungtsü lir.

Iba sentong nung medical team ya Dr. Kelelo Pradia ajanga anir liasü aser Colony Panchayat ketdangsürtemi ayongdenba ama medical team ajanga tashidak balala keta aliba aser mashisa tetsürtem temang repranga angadi medical teyari agütsü liasü.

Iba jubileemung ya "Angamimia Therhu" omen

nung ajemdaker amungtsü. AGOK ajanga züngsem ajunga dang iba sentong nung tepet aben-süoshi agitsü aser sobaliba dak sendakba aben-süoshia agitsü ayongzüka liasü. "Kicha" ajunga indang tir/tezülur tem dang pei züngsemtem ayongshia iba benjongmung nung adentsü ayongzüker, ta sangdong ka ajanga ashi.

Congress-AIUDF tesentaktep ya tashi atema dang: Pijush Hazarika

Guwahati, March 29, 2022 (Agencies): Congress aser All India United Democratic Front (AIUDF) tsüingda tesentaktep tembangogo.

Rajya Sabha election atema electoral agent shimba sülen Congress aser AIUDF tsüingda mangatettep adok.

AIUDF aser Congress-i tesentaktep malitsü molungtep Congress MLA teimba kati Ripun Bora tamakok ngudaktsütsü atema inyaker.

"Congress-i tesentaktep yanglubaji tashi angutsü atema dang aser Rajya Sabha o Lok Sabha election takok angutsü

atema dang lir" ta Water resources parliamentary affairs, information and public relations minister Pijush Hazarika-i ashi.

"Congress aser AIUDF tsüingda "authorised agent"

atema ken o adok. Congress aser AIUDF teloktep ya tashi angutsü atema dang lir. Khen

khen Assembly Election aser khen khen Lok Sabha Election nung takok angutsü atema

parnoki tesentaktep yanglur. Lok Sabha election nung Nagaon, Kaliabor aser Barpeta candidate temi AIUDF den tesentaktep yanglunür, saka taruba Rajya Sabha election

nungbo Upper Assam candidate temi Congress-AIUDF tesentaktep maginür" ta Pijush Hazarika-isa metetdaksü.

"Ripun Bora-i tesentaktep aginür asütsü akok saka parnok kari tesentaktep melinür.

Anungji iba tesentaktep ya election atema dang lir aser authorised agent atema parnok parnok tsüingda rarateper" ta paisa ashi.

Taruba Rajya Sabha election nung BJP candidate Pabitra Margherita aser Rwngrwa Narzary nati takok angutsü, ta Minister Hazarika-isa ashi.

Biren Singh-i 'Jal Shakti Abhiyan' indang State Chapter tenzüksü

Imphal, March 29, 2022 (Agencies): Manipur Chief Minister N Biren Singh-i tanü 'Jal Shakti Abhiyan: Catch the Rain' campaign indang State chapter tenzüksü.

Prime Minister Narendra Modi-i video conference ajanga iba campaign tenzüksüba sülen Biren-i state nung tenzüksü.

Iba sentong nung Chief Minister Biren, Water Resources Minister Letkhogin Haokip, Public Health Engineering Minister Losii Dikho, Chief Secretary Dr Rajesh Kumar, Additional Chief Secretary Letkhogin Haokip aser ketdangsurtem aden.

CM Biren-i Twitter ajanga office, shisaliok rejutem aser kijatem dang tzünglu tzü bendena ayutsü ayongzük.

Tanü CM's Secretariat nung ni "Jal Shakti Abhiyan: Catch the Rain" tenzüksü. Manipur kübok district shia nung tzünglu tzü bendena ayutsü, ta chief minister N



Biren Sing (File photo)

Biren Singh-i ashi.

Paisa ketdangsurtem dang Water Resources, PHED aser Minor Irrigation department tem joint committee ka tentettsü tetuyuba agütsü.

March 22 nungi November 30, 2021 tashi campaign takok ngua inyaksü atema joint committee ka tentettsüla, ta Biren-i ashi.

Tanü sentong nungsa CM Biren-i Directorate of Information and Public Relations ajanga adokba 'Jal Shakti Abhiyan' kaketnu ka sayatsü.

Assam nungi graffiti artist Mahanta nem bail melar

Itanagar, March 29, 2022 (Agencies): Arunachal Pradesh kübok Itanagar nung okadak kati Assam nunger social activist aser graffiti artist Nilim Nayan Mahanta nem bail temelaba agütsü.

Mahanta aser ano tanga activist Ebo Mili naprong Rs 3000 indang bond nung ajemdaker bail temebeba agütsü. Tenati mural ji mezüng aliba ama yanglushitsü ta okadakisa tetuyuba agütsü.

Itanagar nung "Wall of Harmony" nung pai anti-dam graffiti noksa ka yangluba

atema Arunachal police-i Mahanta ya Lakhimpur nung par kidang nungi apu.

Arunachal Pradesh kübok Dibang nung tzünoktang ka yangluba anema graffiti yanglutsü atema Mahanta jaokba liasü.

Arunachal Pradesh nung 57000 MW Mega Dam dak sendakba nung lungkak aitba kübok iba graffiti ya shilem ka liasü.

Itanagar nung aliba Secretariat Building Wall nung Wall of Harmony ta ser art project ka nung pai graffiti yanglu.

Shillong nung bomb apokba NIA-i bushisüngdangtsü



Shillong, March 29, 2022 (Agencies): January 31, 2022 nü Shillong kübok Police Bazaar nung improvised explosive device (IED) ka pokdaksüba atema National Investigation Agency (NIA)-i bushisüngdang asütsü.

NIA-i March 4 nü IED apokba dak sendakba ken o ka benokogo.

Taoba mapang Hynniewtrep National Liberation Council (HNLC)-i IED pokdaksüba tenüng agia

metetdaksü.

Meghalaya nung Shillong police-i iba ken o dak sendakba nung nisung 9 tashi apu.

Police-i apurtem rongnung tanur ka dena lir aser iba nisungji Shillong region atema HNLC area commander lir.

Delhi Mishan Bhandar ta ser dokan ka anasa IED pokdaksü. Ajisüaka, lockdown mapang asüba agi nisung yiruba mesüra tasüba kecha maliasü.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND :: KOHIMA

No. DHFW-5/TRG-PG/2019/3535-38/

Dated, Kohima the 29th March, 2022.

NOTIFICATION

This is for general information to all the intending Medical Graduates that the 3rd cum Mop-up round of Counselling for Post-Graduate courses (Academic session 2021) in the Regional Institute of Medical Sciences (RIMS), Imphal, is likely to be held in the first week of April 2022 for the following vacant seats under "Sponsored" category for the State of Nagaland. The PG seats will be allotted to eligible candidates from the State-wise merit list of NEET-PG 2021.

B. IN- SERVICESPONSORED CATEGORY:

| Sl. No | Subject | No. of Seat |
|--------|---------------------------|-------------|
| 1. | MD (Biochemistry) | 1 (One) |
| 2. | MD (Physiology) | 1 (One) |
| 3. | MD (Respiratory Medicine) | 1 (One) |
| 4. | MS (Ophthalmology) | 1 (One) |

In view of this PG Counselling and reduction in the qualifying NEET-PG mark (Vide No. U-12021/21/2022-MEC dated 12.03.2022 of MCC, New Delhi), fresh application are invited from the interested candidates (through the sponsoring authority, wherever applicable). The filled in application form can be downloaded from RIMS website www.rims.edu.in

The Counselling fees of Rs.2000/- may be deposited on the day of counseling.

The exact date of counseling will be notified later on RIMS website.

In case of an advert that subsequent to this round. RIMS will be conducting a mop-up round, wherein there may be other seats available. The Department will, therefore, be submitting nominations based on merit without any further advertisement.

The last date of submission of application forms in the Directorate will be on 1st April 2022.

SD/-

(DR. NEIKHRIELIE KHIMIAO)

Principal Director

Dte. of Health & Family Welfare
Nagaland, Kohima.

GOVERNMENT OF NAGALAND DIRECTORATE OF TECHNICAL EDUCATION KOHIMA, NAGALAND

NO.DET/ESTT-2/5/2016-17

Dated, Kohima the 29th March 2022.

NOTIFICATION

Applications are invited from the interested In-Service candidates with eligibility criteria laid down below for admission to Degree Module course at North Eastern Regional Institute of Science & Technology (NERIST), Itanagar.

| Sl.No | Particular | Requirements |
|-------|----------------------------|---|
| 1 | Branch/Field | Civil Engineering |
| 2 | Duration | 3 years course |
| 3 | Minimum qualification | 3 years Diploma with minimum 60% pass percentage from the Institute recognized/Approved by AICTE |
| 4 | Maximum Age | 40 years as on 1st August 2022.SC/ST and PH 45 years as on 1st August.OBC and Woman 43 years as on 1st August 2022. |
| 5 | Certificate of Undertaking | From the concerned Department that the candidate shall be sponsored for 3 years. |

Selection shall be done purely on the basis of academic performance. Last date of submission of application along with all documents to the Directorate of Technical Education is on or before 30th April 2022.

(Er. M. Nakro)
Director.

GOVERNMENT OF NAGALAND DIRECTORATE OF TECHNICAL EDUCATION KOHIMA, NAGALAND

NO.DET/ESTT-2/5/2016-17

Dated, Kohima the 29th March 2022.

NOTIFICATION

This is for general information that online applications are invited for NERIST entrance Examination (NEE) 2022 to be conducted by the North Eastern Regional Institute of Science & Technology (NERIST) Nirjuli, Itanagar, Arunachal Pradesh for Certificate Module Courses and Degree Module Courses in Technology streams and also in Forestry.

Schedule for online submission of application forms is from 20-02-22 to 02-05-2022. Further details may be accessed at Institute official website www.neonline.ac.in or www.nerist.ac.in.

(ER.M.Nakro)
Director.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 30, 2022

Government mali!

Nagaland nung government nung alirtem dak alaka yimten aser lokti lenirtem aikati Kohima aser Dimapur dak alaka Nagaland kübok tanga district-tem nungbo state government aliba mong kecha mangur ta tejashi aser tesasaba o jembir. Kasaji tang tasen tentetba yimten telok Raising Peoples' Party (RPP) purtemia parnok tetsüng agi Nagaland tesem kar sema jajaba sülen, parnok tenük agi anguba kuli ka ashijaji, Mokokchung district ama nunga gari sadema moutetba yimtsüngtem aika lir, ajisüaka iba dang nung jagi tamajungba, tesasatsüka, Nagaland anüdoklenbo tesem ajaklen government aliba tamaitüsü kecha mangur ta metetdaksüba osangji liasü. Atangji, iba osangji nunga ta meshitettsü. Akok ka asübo, Nagaland nung government mali ama anguba tesemtem ajakji video agir sayu asübo nisung aika aoksala. Iba ama shiba dangang kechi mashi aser metongloktsü aliba mapang ka, ano Tuensang nung Chang kaketshirtemi PWD (H) Executive Engineer office shibanga yutsüba jagi yangjia government maliba kuli ka sayur. Chang kaketshirtemi ashiba agi, joko küm 16 shi PWD office nung inyakertemji gari ayudak ki garage ama ka nung inyaker aser tanga terenlok mapatema aika meinyak aser merenem yuja lir. Kasaji, tamalena Mon district nunga kaketshirtemi Education office agi office memesük ki tejen tamajung ka shibanga yutsüba asenoki nguogo. Iba amaji Nagaland nung gari lenmang tamajung nung gari tajung raksaa jajadang government menungrar aser item lenmangtemji government nem ngudaktsüner. Ano, Tuensang alema orrbo mesüra Mon district nungsa asüyonga arrtsülen aliba purtembo kechi komaka tia nung alitsüar ashitsü makok. Nagaland aliba tamaitüsü metettsübaji parnok yim tonga gari lenmang tajung alitsüla, electric light tesangwa agi manüngtsüla, joko tokolak nung tzüshi bener tzüda maotsüla, mozü ki bushia aodang süngra nung apur aotsüsaba tia nung malitsüla aser angati kaketshisatsü tajung pei alidak angutsü tim. Ano, asenoki anüdoklen alirtem indangang süoki taiba bilemetsür dang ashi, anülulen Peren district nunga tang tashi yamai alir na (?) ta asütsüsa nübortem teküpbok tia nung aliba asenoki angutsü. Itemji kodang Dimapur aser Kohima den medemdangdir, atangji temetemdangtsüla masü, kechiyong Dimapur aser Kohima nungbo gari lenmang terabo junga lir aser mozü ki aser kaketreju tajung aika lir. Ajisüaka, kodang asenoki Kohima aser Dimapur dak alaka Nagaland nung tanga tesembo government-a mali amato sendoka tokja lir ta jembidir, Kohima aser Dimapur yimti yimdong nungbo Guwahati aser Imphal ama ajem tsüka ngua temerük aser tajung alitsü amai bilemer. Aji oda, Kohima aser Dimapur nung akaba government school aser mozü kitembo teronema menema jungjunga anepalua alitsüla amai bilemer. Ajisüaka, Dimapur aser Kohima-ji private meyong mozü ki aser kaketreju kar aliba agi tanga yimti tera mesüka angur ashi, shitakba nungbo Dimapur yimtibotangar dang sayutsüla masü. Yimdong anak auyi agi sünga lir aser aonung yimdong nung street light tsükloka mangutsü. Ano, Nagaland nung government aliba aser maliba indang tejembidak nung, Dimapur nung aonung tetsür tebur adenshia yi jema tsüngsangdak night club-tem NSCN-IM government-i shibangtsüogo. Nagaland nung state government ali maliji item kulitem jagi ashitsü. Anüngdang pei pei ali alir aser aonung yimti anüker mali, tesem ajaklen japujari ozüng raksaba mapa agi sünga lir, saka tenokdang aser tazüoker mali, anungji karibo azüoktsüla aser repringtsüla. Nagaland tenung nung ajaki tajangzükbo aginer saka Nagaland anepalur mali kümogo. Nagaland tenung nung ita sen achir tetsa saka Nagaland asoshi inyakerbo mangur. Asenok ya ak ama dang, shibanga yur India government nem mesüdaktsürtem lir. Joko, yamai melii nüchi küma aruagi, Nagaland tesem ajaklen government aliba nübortem metettsüsa, pei pei constituency nung pei pei MLA-i anir inyaksüla aser pei pei department aser pei pei office nung tokolak purtemi anir nübortem meima tenzüksü tim.

OLEMSABANG

GIDEON DEN SEPAI NOKLANG ASEMJI SHIRNOK ASÜTSÜ?

-Bendang imsong, (Social Activists),
Mokokchung, Nagaland

Naga lima nung Election merüka agitetsü asoshi osang kaket palala nung züngshi dang tezülur ajak dang pelar aser nenok nungi shisa tajung onoka angazüker. Item zülutem ajanga Election merüka amongtsü nungdak ta angatetba pur aika lir ta ajitetter. Covid19 wara tashidak ajanga asen lima rongsen kütsüng kanga mejungi raksatsügo.

Election mapang Candidate aser nübortem ai belenba kar shisemner.

- * Election mapang Candidate aikatilokti balala dang interest nung sen apua tokteper aser Election nung madokra sentsütsür akümer, aser adokra item sentsütemji dang tamasa aotsü meranger aser parnok lar akümer.
- * Nuburtem aika ayangtsü asoshi bendanglen oa aliba, pei yimtsüng constituency arua ochimashi rongsen candidate dang meshizüker. Iba sen nungi 50 percentdang lemtsür aser tanungba 50 percentbo par kibong asoshi ali kimong/Cari/farm/ RCC ki tululu asür.
- * Election mapang non local corepatti, Political Backdoor appointee aser central sponsor scheme/ contractor/ temi tongti shilem agir.
- * kodang polling anogo tonga arudir kandidatetemi hadir ajakarangshitsü. Oda, sen/perangpong/tolongbur aser pai mesüa aliba telok balala alu/farm/business etc taküm bendanga agütsütsü nangzükteptsü aser proxy vote tashiyim amshia ajentsütsü asoshi tasa balala amshia injang bomb amshitsü.
- * Politician aser tulur/takartemi parnok farm/alui jaoka sentongtem yanglutsü temesupba chiyungtsütem den sen lemtsütsü aser item osetji yimtsüng anasa arem nung meima ayutsü kodang nungdak adoktir iba mapang amshitsü.

Tanü Ao lima nung teyazü proxy vote ABAM aser arogopurtemi anir merükteta meintoktet tashi azü tokshiba, anungji arishi tempangba manentsü. Danger menepba lenir madoktetba ajak teraji election nung nuburtemi ai belenba temenen ajanga lir. Laishibai yamai ashir APIJEMTSÜ 26; 27" Shibaisa kangla tudir pa idakji tsüktsü, aser shibai lung mezüdir aji pa dangi meyiptsü. "Senso candidate shimba yimtenji ABAMI ayongba clean election anema inyaker aser alima ashioksür ta metettang.

2018 general election nung tenzükter kipong kar sen meshia achiba jangjaoko. Iba nung tepilemdangtsü tulu lir, kechiba sura Arogoi tenzükertem ita sen tila, tepok mesüngi agütsüba ajanga tai menadaktsür. Clean election takok angutsü tongtipangtiba Onukji ABAM ajanga tapet sentong yanglua arogoi kipongshia dangi Tsüngrem osang den par tepilemstü khuretem lemsatepba lenmangtem sayuteptsüla. Tanabuba nung tayongzükter onsara saka tasüita inyakerbo mali? Yisu nutsüng Peteri menangzükba ama polling anogo nungbu pei vote agütsü a maruteti tsübuteper. Nai ya metettang... na E Roll nung nu tenung lir vote magütsüra kecha nunga temeten mali.

OBENDANGER 7: 2 nungi 18 Lenir GIDEON mapang tsükchir MIDIAN tongpangi aotsü sepai meyi semerana apuso, saka tatem nung tasü-tait sepia noklang asem shimtetta takok anguba ama, ABAM clean election committee anir Tsüngrem dang shisatsü meshia tasü-ita clean election takok angutsü asoshi, ABAM ASER KHRISTAR AROGOTEM NUNGI TENZÜKA MESHİ METSÜ MASÜTSÜ AYONGZÜKER.

TEMELENSHI ADOKDAKTSÜBA LENIR SHIMTSÜLA:

Mosa taküm otsü nungi tangazüktsü kar

- Temsüyanger

(Yashi adok nungi...)

Mosa Lenisüba nungi tangazüktsü kar

Mosa taküm aser mapatem nungi asenoki angateter; pa merumeru taküm ka masü, takokba mapa asoshi pai kodanga lemanng tatsüba nung mejaja, anungji pa ochishiba taküm takang ka liasü, aser pai tangar alema tua maongka kodanga mebushi aser pa asoshi kecha mebushi. Kodang nisung ka taküm nung iba ama sempet taküm tajung ledir pa/la temulungjang, tepang otem, aser inyaksangshi sütep-sütepba alir. Kodang lenir kati yamaji tepang o aser mapa sütep sütepba litetdir nübortem pa/la dak temulung alemer, aser kodang nübortem temulung lemdir pa/la chichiba lenir ka akümer. Nübortem temulung lemetetba lenir kaji chichiba lenir ka lir. Pei asoshi taginübatem aser mulungbatem alema lokti asoshi tajung bilema inyaksü asoshi Mosa taküm ajanga sayur. Tanu putu nung lenirtem aika ama, sen tashi dak rangloker nübortem pa/la dak temulung alema lenirtem masü, saka Mosa ama Tsüngrem dak metaloka litetba ochi aser ajemaluba lenir taküm aser lenisüba agidang shitakba nübortem nem temelenshi aser nüchi bener arudaktsütetsü. Tanü Naga lima sen agi tashi agütsüba lenirtem dang nübortem shimtetta ajanga Naga lima kechi tia nung lir bilemdangdi.

Lenir tajung kati nübortem temulung lemettsüsa taküm nung liteta sayur, teyaritep tajung nung tangar den tesendaktep tajung yanglur

Mosa taküm nungi maneni angazüker; lenir ka taküm nung tongtibangtiba taküm leniba kaji pa/la-i pei jenjang metettsüla, aser pa/la taküm shisatsü akhüm tsübuva yamaji pei taküm nung litetta tangar dang sayutettsüla, kechiasar tatishitsü tajung aketba lenir tajung ka jagi pa/la jaklaluru aser mapa ajanga sayur. Lenir tajung ka jagi mangdang tajung shisatetta iba jagi nübortem jaklaluru melenshidaktsür. Lenir tajung ka jagi tarutsü asoshi mangdang tajung nguteta iba mangdang tajung tangar dak benloktsür. Lenir shibai tarutsü asoshi mangdang tajung angur pa/lai pei taküm nung aser mapa nung item agitsü asoshi renema alir, aser pa/lai aibelenbatem nungi tangazükba tajung nguteter. Lenir tajung kati nübortem temulung lemettsüsa taküm nung liteta sayur, teyaritep tajung nung tangar den tesendaktep tajung yanglur. Lokti telungjem mapa (teamwork) aser teyaritep pa/lai kanga senti süa agir. Pa/lai lokti nung tangatetbatem balala angatettsü meranger aser yamaji lokti nung tangar akhümtsübuva tangar den tesendaktep yanglur.

Mosa taküm aser lenisüba ajanga ano maneni angateter, Mosaji democratic lenir ka liasü. Khuret balala lemsatepba telungjem nung abentsübaji pa nükjidong liasü. Nübortem nem nüchi agütsütsü asoshi pa lenisüba nükjidong liasü. Ijip Farao chuba lenisüba aser Mosa lenisüba kenyongi balala liasü. Farao chuba lenisüba tashiyim amshia takümtem aika alar tia-i yoka taküm samatsütsü merang. Saka Mosa lenisüba ajanga item teküpoktiba tia nung aliba nübortem taküm nem nüchi agütsütsü nükjidong liasü, aser yamaji Mosa lenisüba ajanga alar tia nung aliba nübortem taküm nem temelenshi aser nüchi agütsü. Alima aser tanelar lenisüba anaprongla asoshi Tsüngremi khuret agütsüba nükjidong aser tajabaji kasa dang, aji kechi ta süra, Tsüngremi alima nung taküm (life) yanglubatem taküm wazüka nüchi agütsütsü asoshi lenisüba tajaba. Alima yimsütsüba nung lenirtem, lokti balala nung lenirtem, aser tanelar wadang nung lenirtem, taküm asoshi Tsüngremi na/ni lenisütsü jatetba süra, na/ni lenisüba ajanga alima nung taküm wazüka nüchi agütsür asü, mesüra taküm raksaja aser samatsür? Taküm nem nüchi agütsütetba lenisübaji temelenshi adokdaksüba lenisüba. Tanü lokti nung lenirtemi Mosa taküm aser lenisüba nungi angazüktsü aika lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bible Society of India ajanga seminar ayongzük



Dimapur, Metsüremi/March 29 (TYO): Bible Society of India Pfütsero Branch ajanga March 28, 2022 nü CBCC Conference Hall nung promotional seminar aser ketdangpur tasen shimokba sentong ka anepdang 10:00 ako nung ayongzüka agia liasü.

Iba seminar nung arogo balala nungi pastor 26 arua shilem agia liasü. Sentong nung Thekho Rova, tir, BSI Pfütsero Branch onir liasü aser Krishna Ramauli, Pastor, Nepali Baptist Church Pfütsero Town ajanga sentong tenzüka sarasadem.

Ngotso D. Sakhamo, Treasurer ajanga sentong nung melepzüing o jembiba mapang, Bible ministry ya mission aser arogo indang ministry ajak asoshi metsüingjang lir, ta ashi.

Rev. Dr. Yiepetso Wezah, Auxiliary Secretary ajanga Bible Society of India indang ministry balalai inyakba lemsatop aser arogo temi shilem agitsü kanga tongtipang, ta shia liasü.

Iba sülen sensaksem mapang agia liasü aser Mutukhruzo Venyo, Secretary ajanga melepzüing o jembiba. Auxiliary Secretary ajanga

ketdangpur tasentem shimokja liasü. Ketdangpur tasentemji Rev. Dr. Tshülingupe Kapfo (President) Pastor, Pfütsero Town Baptist Church; Pulio Tetseo (Secretary), Immanuel Baptist Church; Akhrole Wetsah (Treasurer), Calvary Baptist Church. Vice President ji Deo Leah, Pastor, Tsupfume Baptist Church aser Tekhewe Khutso, Asst. Pastor, Zapami Baptist Church alitsü aser Joint Secretaries ya Rayi Sakhamo, Youth Director, Porba aser Chekroso Kezo, Pastor, Thenyizu Baptist Church alitsü.

Shillong nung teburtem atema sentong ayongzüka agi



Shillong, March 29 (TYO) : Tebur kati pei teinyaktsü shilem meteta, kodang temang aser tanüla nung tashi itta lidir, iba tebur jagi kidang kibong, arogo, lokti aser yimten tashi itdaksür ta angateta, Ao Baptist Arogo Shillong-i tan March 26 aser 27, anogo ana agia teburtem asoshi 'Men's Fellowship' sentong ka Shillong nung kanga temoatsü nguwa ayongzüka agiogo.

Iba sentong nung Guwahati Ao Baptist Arogo nung sannüker Rev. Aowabang Ozükümi kibong nung tebur kati pei teinyaktsü meteta khuret

abentsüba indang onük nung jembiba liasü. Kasa sentong nung kibong, arogo aser lokti nung tebur ka shilem onüktem benoka shisalemsatopba mapang liasü. Iba denji ano kasa sentong nung shilem agirtem rongnung pelatepa volleyball asayaba, ango mesüba, zütsük aonba aser pongsen asenba mapatem inyaka liasü.

Arogo nung iba ama teburtem asoshi sentong ayongzüka agiba ajanga kidang kibong nung tebur shiai pei teinyaktsü shilem tajungba angateta arogo aser lokti asoshi

teyarir tajung kaka kümtettsü ta iba sentong nung adenertemi pei temoatsü anguba lemsatopa liasü.

Iba sentong ya Wb.Sentipong Longchari'er lu (farm) nung monga liasü. " Tanü ama tensa ka nung, pei kidang kibong aser lokti nung tebur kati pei tata shilem jangjaa alitsü aser inyaktsü iba 'Men's Fellowship' sentong ajanga rajemtsüogo," ta sangdong ka ajanga Ao Baptist Arogo Shillong nung tezülur Wb.Temjenmangyang ajanga metetdaksü.

ANOGO ABEN TSÜNGREM DEN

Talangi atuba

"Aser pai ni Tanela nung tenem tulu talang kati anir atu..." J.Adok 21:10

Iba ama mapang nung asenoki tebilemba balala aika adoker. Alima nung mapa tulu adoka temelenshi adoker. Kijaji kodanga yareta makümer. Aji oda liaka mapang ajak nung tebilemstü tulutibaji kija takümü lir. Iba dang tali ajak metetsang kodaker Tebui nisung ka kisung yimsüsür inyakba ama telok dak meinyaker. Meimchir Tsüngrem mesükba nung yanglu nungji, petinu tulutibajia meimchir dang nungi tilaba lir. Ajemalutiba tamanger kajia orion aser pleides yanglusang senti züi Kalvary kangki nung alizük nung pa/laji senti lir! Teti dang repranga aliba Tsüngrem tenükji kija taküm shia repranga nüka lir ta tangatetba asenoki iba küm tasen tenzükdi.

Khristan ka ama tanü tensa terenlok ajak asenoki tenem kolak nungi reprangtsüla. Asenoki temejuget nung noktak nung dang talang nung aliba angutsü. Ali telemok nung mener alima tebur tajungji mangutsü. Ajungket nung mangdang angur. Asenoki lenden tuluba aser metong talangba nguner asenok tenem temejong nung noktaksüla. Johan dang Tasen Yirusalem sayutsü atema Pa tenem tulu talang kati anir atu. Ibai masüdang Pa tzüyim küm nung notaker Tsüyim tarok nungji adokba shiruru nguwa liasü (J.ADOK 13:1). Tanüa asenoki tawa- tanü lima nungji adokba shiruru aika angur, aser ishikatidang "Tasen Yirusalemji" anung nungi aluba angur! Aika teküpboklen Tsüyim kümbang nung alir. Idakji tepuatsü aika dang lir. Idakji TV aser radio nung inyakertem alitsü. Anungji idakji anogo shia osang kakat adoker. Magazinetem adoker. Idakji leman nung sensakasenba aser business alitsü.

Khristar nübur alima tzüyim jenjanga alitsüba kodanga masü. Asenoki tenem kolakji reprang, shidakba tangatetba nung rangloktsüla, shidakba tangatetba bushitsüla. Asenok tensa tatalokbatemji ain kar shin o den medemdanga, Tanela Temeshi tenük ajanga, Tsüngremer nükjidong aser Khristai tatem nung takok anguba nung rangloker angatettsüla. Asen mapang nung tzüyim nungi adokba shirurutem jaki memeteti " Tasen Yirusalem" asoshi terenemba akar. Tatemsa Kibubai takok angutsüba kuli asür.

Saka asenoki anogo shia taküm nung iba mangdangji koda ayutsü ? Asenoki Laishiba anasa alitsüla. Asenoki Tanela jashidaktsüba mapa, aser telung nung pa kuli asüba anema kümdangtsüla. Tanela Temeshi dak metaloker asenoki küm tasen terenemba lemtettsüla.

Asenoki küm tasen nung item tezüngzüktepba Kibuba den yanglura iba tetezü mejembitetba temoatsütem angutsü. Ni anogo shia sarasadem nung minute semer dak tajemba magütsütsü. Ni hopta shia nisung ka dangbosa Kibuba indang kuli asütsü. Ni anogo shia Tejen aser Tasen Lai nungi maneni azüngtsü. Ni kü taküm nung Yisu melen kecha leman meshimtsü. Asenoki iba küm tepiyong lira, iba jaki tesünep teimla kuli asütsü.

Nigeria nung kiralongrar temi Khristanpur 50 tepset, 100 pua bener ao

Abuja, Metsüremi/March 29 (Agencies): Fulani shiruru metsürtemi Brehostibarnü (March 24) Kaduna state, Nigeria nung Khristanpur 50 tepset aser Catholic putir ka densema nisung jenti pua bener ao, ta osang ajanga ashi.

Giwa County kübok Khristanpur timba aliba tesem 10 nung aonung menur amakdang shiruru metsürtem aser dangartemi nisung 100 shi pua bener ao aser tekülem ki ka rongdoktsü, ta yangji alirtemi ashi.

"Parnoki nisung aliba ki, store

rongdoktsü aser shiruru tepset. Iba lendong ya Hokulbarnep (March 25) tashi liasü. Parnoki nisung tasümanga meremdaksü aser parnoki mangyimer aser asüpila sentong agitsü arurtem daka injang khaloktsü," ta yangji alir Nuhu Musa-i Morning Star News dang text message ajanga ashi.

Asürtem rongnung tetsür aser tanurtem liasü, ta Musa-i ashi. Tekülem ki ya Zangon Tama yimtsüng nung aliba rongdoktsü aser parnoki Unguwar Kaya Fatika, Barebari, Dillalai, Unguwar

Bakko, Gidan Alhajin Kadi, Kadanya aser Durumi yimtsüngtem mita ao, ta pai ashi.

Lendong agütsürtemi Dillalai, Barebari, Dokan Alhaji Ya'u, Durumi, Kaya aser Fatika yimtsüngtem amakba osang lir, ta Kaduna state indang Ministry of Internal Security and Home Affairs nung commissioner, Samuel Aruwan-i ashi.

Zangon Tama yimtsüng nungi dangartem den külemi St. Ann's Catholic Church indang Catholic putir Rev. Felix Fidson Zakari ya prangbong agi tuitir anir ao, ta yangji alir nisung pezüü

ashi.

Yangji alirtem aser Catholic Diocese of Zaria indang odongtar ajanga putir atema sarasademtsütsü ashi.

Sorkari iba ama lendong nungi nüburtem mekumzükter, anungji Kaduna state nung iba ama lendong teti ataloker, ta yangji alir Muazu Gogi-i ashi.

"Onok atema imlibilema sarasademjang. Fulani kiralongrar temi nisung tepsetba aser ki-o-jen raksatsüba sorkari meteta lir, saka nüburtem kumzüka meyuteter," ta Gogi-i ashi.

Benue state nung

Bodhbarnep (March 23) Fulani shiruru metsürtemi Khristanpur asem tepseta liasü aser ita tetenzüklen kasa state nung parnoki Khristanpur timba aliba tesemtem nung nisung 20 dak tema tepseta liasü, ta osangtem ajanga ashir.

Katsina-Ala County kübok Khristanpur timba aliba Yoli yimtsüng nung alirtemi ashiba agi, Fulani teloki anepdang 2:00 ako (par mapang) meta amak aser iba mapang nisung ter dak tema yirutsü aser aika pei ki yutsür jena ao.

(Maneni tapak 10 nung...)

OLONG PAITEP # 6126

| | | | | | | | | | | |
|----|---|----|----|---|----|----|----|----|----|----|
| 1 | | 2 | | | | 3 | | 4 | | 5 |
| | | | | 6 | | | | | | |
| | | | | | | | | | | |
| | | | | | | | | | | |
| | 7 | | 8 | | | | | | | |
| 9 | | | | | 10 | | | 11 | 12 | |
| | | | | | | | | | | |
| | | | 13 | | | 14 | 15 | | | |
| 16 | | | | | 17 | | | 18 | | |
| | | | | | | | | | | |
| | | | 19 | | | 20 | | | | |
| 21 | | 22 | | | | | | | | 23 |
| 24 | | | | | | | | | | |
| | | | | | | | | | | |
| | | | | | | | 25 | | | |

| | | | |
|-------------------------------|-------|-----------------------------|-------|
| TIPIEN | | LANGTSÜNGLEN | |
| 1. Saku | - (4) | 1. Taksep | - (3) |
| 6. Songjen | - (7) | 2. Langtem | - (5) |
| 7. Mali/Tazüng | - (4) | 3. O tamendaktak | - (4) |
| 9. Tasen apok | - (6) | 4. Nütsü tebuba | - (3) |
| 11. Songtem | - (3) | 5. Anüngdang tesangwa | - (3) |
| 13. Ata liasü | - (5) | 6. Apitet | - (5) |
| 16. Tzünglu den külemi tsüker | - (3) | 7. Yagi jungdaksür | - (4) |
| 17. Aso tila | - (6) | 8. Anogo semer ka | - (3) |
| 20. Tashi maküm | - (4) | 10. — — tatsü | - (3) |
| 24. Tenüng kasa jatepba | - (7) | 12. Tebür kidong aser zünga | - (4) |
| 25. Ki yangluba oset | - (4) | 14. Pela agizükba tapu ka | - (5) |
| | | 15. Tenüng atet | - (3) |
| | | 18. Mejanga onü | - (5) |
| | | 19. Talak techira | - (4) |
| | | 21. Maneni | - (3) |
| | | 22. Nübo teyi | - (3) |
| | | 23. Meshi | - (3) |

OLONG PAITEP # 6125 TELANGZÜBA

| | | | |
|---------------------------------------|--|--------------------------------------|--|
| TIPIEN : | | LANGTSÜNGLEN : | |
| 1. Telok, 4. Aluru, 6. Ozüng, 8. Emk, | | 1. Tenükjang, 2. Luden, 3. Kiochtsü, | |
| 9. Kin, 10. Teti, 12. Süir, 13. Jen, | | 5. Lenti, 7. Tajangzük, 11. teronem, | |
| 14. Ola, 16. Talak, 17. Mazük. | | 12. Sempa, 13. Jahaz. | |



ALOKBA TV ALIR :

- Alokba** : Malik, iba TV ji sen kwi meshir?
 - Kibur** : Ya Kanga dang langa ayoker ako, meyrjang tenemser ana danga.
 - Alokba** : Tetezü Rs.52,000/- na?
 - Kibur** : Hau telur.
 - Alokba** : Iba TV nung kechi facility ali, paikaji meshir?
 - Kibur** : Iba TV nung special facility ji, programme kar reprangya lia kodang power/light oadokdir TV ya pa sasaa dang off asür ati.
 - Alokba** : WOW, yakta packing süjang!
- Lilir : WhatsApp

TANÜBO NAI LANGZÜANG

Q.' Rashtriya Sanskriti Mahotsav 2022' ya koba State/UT nung lapokja liasü?

[A] Rajasthan [B] Andhra Pradesh
 [C] Gujarat [D] Uttar Pradesh


(Taruba adok nung onoki langzüksü)

YASHI ADOK TELANGZÜBA: India

AO OSHI ANGAZÜKDAK:
TANÜ ANGAZÜKTSÜBA OJANG

Mesong
 (v) waktet (swelling)
 * Jara nung tenütsü atsükba agi kanga **mesonga** aküm.

Mesü
 (v) süngzü agi alentep (knot)
 * Ozü tanuri kü tsüngsem lisü **mesütsü**.



NAI-A YA METETTER MA



Taiwan indang 'medical supply' company kati alima nung surgical mask tulutiba yanguba atema Guinness World Record ajangzüket. Taoba hopta Motex Mask Creative House nung 'Motex Healthcare Corporation'-i iba surgical mask saya. Iba surgical mask tasazük lenden nung süklep 27 ser inch 3 aser metong nung süklep 15 ser inch 9 asütsü. Guinness World Records-i ashiba agi iba mask ya 'standard face mask' dang nungi 50ben agi tuluba lir.

SUDOKU # 6165 TELANGZÜBA # 6164

| | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|
| | 8 | 1 | | | | | | | 4 | 3 | 5 | 8 | 9 | 7 | 6 | 2 | 1 |
| | 9 | 7 | | 8 | 1 | | | | 8 | 1 | 6 | 4 | 2 | 5 | 9 | 7 | 3 |
| | | 6 | 7 | 9 | 3 | 1 | | 4 | 2 | 7 | 9 | 6 | 3 | 1 | 5 | 8 | 4 |
| 9 | | 5 | 6 | 2 | | | | | 1 | 5 | 2 | 9 | 4 | 3 | 7 | 6 | 8 |
| 6 | 4 | | 1 | | | 8 | | | 9 | 8 | 3 | 5 | 7 | 6 | 1 | 4 | 2 |
| | | | | | 5 | 7 | 9 | 6 | 6 | 4 | 7 | 2 | 1 | 8 | 3 | 5 | 9 |
| | 2 | | 8 | | | | | | 3 | 6 | 8 | 1 | 5 | 4 | 2 | 9 | 7 |
| | 6 | 9 | | | | 3 | 8 | | 7 | 9 | 4 | 3 | 6 | 2 | 8 | 1 | 5 |
| 5 | | | | 4 | | | 2 | | 5 | 2 | 1 | 7 | 8 | 9 | 4 | 3 | 6 |

OJANG LUTEP # 5711

- KOTAK :
- TSANGUÜ :
- OSHASI :
- NGMERAH :
- KTSINYAÜBA :
- ADK :
- LAACA :
- ATENSAYYA :
- KABALA :
- LMAI :

OJANG LUTEP TELANGZÜBA # 5710

PEI TEINYAKTSÜ MAPA ANÜNGDAKA MEYUI
 MAPANG SHITAK NUNG INYAKADOK TAJUNGBA

TAN HOPTA ATEMA - KOMA SÜLA ?

Q. Nagaland Medical College ya renemer külen tesayurtem ajak Naga nunger asü nunga koma süla ?

Indian Youth Congress-i totzü jenjang ajungketba anema longka ait



New Delhi, March 29 : Indian Youth Congress züngsemtemi petrol, diesel aser LPG jenjang ajungketba anema New Delhi nung Mongolbarnü longkak aiba mapang tangokba noksa nung angur.

New Delhi, Metsüremi/ March 29 (Agencies): Taoba anogo ti tsüingda tenetbenbuba petrol, diesel aser LPG jenjang ajungketba sülen Mongolbarnü Indian Youth Congress züngsemtemi Delhi nung petroleum ministry indang office kima longka aita liasü.

ANI-i lemsatepba noksa nung parnoki placards aser 'matkas' (pots) amer tangokba sayuogo. Congress lenirtemi Centre nung BJP sorkari tashiyim amshia saru meshir aser totzü jenjang ajungketba ajanga tajangzük agir ta shia aija arudar. Opposition party-isa 'mehngai-mukt Bharat abhiyaan' shilem asem küma lemsar agitsü sangdongogo. Iba sentong kübok parnoki linük kübok tesem balala nung March

31 nungi April 7 tsüingda rally aser longkak aitba sentong balala ayongzüka agitsü sentong lir.

Congress lenir Randeep Singh Surjewala-i tawa ashiba agi, petrol aser diesel indang excise duty tanem tanemi ajungketba ajanga sorkari küm ti tsüingda sen lakh crore 2 aazükogo.

Bengal nunga Trinamool party-i linük nung toktzü jenjang ajungketba atema sorkar aitsüogo. "Hopta ka tsüingda totzü jenjang tenetben ajungketter. Ato Kilonser-i India nungertem tebilemtsü ajemdaktsütsü atema mangli sangwali ta yamasa inyaksangshir," ta party-i tweet asü.

India nung Mongolbarnü

densema anogo ti tsüingda totzü jenjang tenetbenbuba ajungketogo aser totzü jenjang ajungketba ya Ukraine nung rara adoker aliba ajanga ta sorkari shia arudar. Petrol jenjang liter nung paise 80 ajungket. Hombarnüa petrol jenjang paise 30 agi timba kümtsüogo.

Delhi nung petrol aser diesel jenjang liter nung sen 100.21 aser 91.47 jungogo. Mumbai nung petrol liter nung sen 115.04 aser Diesel jenjang sen 99.25 jungogo.

Chennai nung petrol aser diesel jenjang liter nung sen 105.94 aser 96.0 jungogo. Kasa mapang nung Kolkata nung petrol jenjang liter nung sen 109.68 aser diesel jenjang sen 94.62 jungogo.

PM Modi-i MP nung ki lakh 5.21 semzüktsü

Bhopal, Metsüremi/March 29 (Agencies): Ato Kilonser Narendra Modi-i Mongolbarnü Madhya Pradesh nung Pradhan Mantri Awas Yojna (PMAY)-Gramin kübok beneficiary lakh 5.21 indang ki semzüktsüogo. Kiburtem nem ki tasen bendanga agütsüba sentong; 'Grah Pravesham' nung pai shilem agia liasü.

Video conferencing ajanga sentong nung o jembiba mapang Modi-i, par sorkari sensakertem nem talidak ki agütsütsü atema kanga tongtibangsa inyakogo, ta ashi.

Tang tashi nung linük nung PMAY scheme kübok ki crore 2.5 yangluogo, kong yimdak yimtsüngtem nung ki crore ana yangluba densema lir.

Iba sentong nung Madhya Pradesh chief minister Shivraj Singh Chouhan-ia, Chattarpur nungi shilem agia liasü.

Maneni Ato Kilonserisa ashiba agi, linük nung Nal-Jal scheme kübok kibong crore trok nem water tap connections parnok ki tonga bener otsüogo.

Iba dak alia sen crore aika alang sensakertem nem agütsüba jangotsü auyaba

nungi kümzüktsü atema 2014 küm nungi tenzuka tang tashi nung BJP-i aniba sorkari ration cards taila crore pezü dak tema poteta thitsüogo, ta PM-i ashi.

"Tatembangbuba nisung nem dena sorkar scheme tem ajanga tajangzük agütsütsü asoshi onok policy lir," ta pai ashi.

Modi-isa, linük nüjiso ngur küm 75 ajungba mapang, taruba ita 12 tsüingda district ajak nung 'amrit sarovar' (tzübo) 75 atutsü atema tenangzükba ka agitsü asoshi nüburttem ayongzüka liasü.



Patna, March 29 : Centre sorkar indang anti-labour policies anema linük ajunga nung longka aitba mapang Patna nung Mongolbarnü Dak Bungalow lenmang nung Left Trade Union-i longkak aiba noksa nung angur.

Mamata Banerjee-i Centre sorkar aitsü

Darjeeling, Metsüremi/ March 29 (Agencies): West Bengal chief minister Mamata Banerjee-i Mongolbarnü ashiba agi, West Bengal nung temzüing ozüing chirepogo ta shia totzü jenjang ajungketba dak nüburttem meranglokdaktsütsü atema Centre nung BJP sorkari inyakdar ta shia sorkar aitsüogo.

Darjeeling jila nung public rally ka nung ojembiba mapang Banerjee-i iba olen jembia liasü. Laisa, Darjeeling nung amendaker aliba political party tem dang parnok yongtsü nung mangatetep alibattem ajak toktsür north Bengal nung iba tesem terenlok atema inyaksü ayongzüka liasü.

"Totzü jenjang ajungketba ajanga nüburttem kangshitepdar aser BJP-i onük tongtibangba dak nüburttem rangloker metoktsü tanga onük tilateritem nung ranglokdaktsütsü atema inyaker aser West Bengal tenüing menüktsür," ta lai Birbhum's Rampurhat kübok Bogtui yimtsüng nung nisung teku tepsetba indang tetshia jembia liasü.

"Yimjung raksatsütsü atema BJP-i West Bengal nung temzüing ozüing chirepogo, ta ashir. Saffron party-i asen state mesüra nüburttem memeimer. State terenlok asoshi parnoki kecha süoki ia mali. Parnok election matong tsüingda arutsü aser tenangzükba aika agütsütsü,

ajisüaka kodanga mataloktsür," ta TMC leniri ashi.

Laisa, tawa state pezü nung assembly election akokba sülen Centre nung BJP sorkari totzü jenjang ajungketogo, ta ashi

"Iba ajanga parnoki nüburttem atema koda bilemer aji sayur," ta Banerjee-i ashi.

Chief minister-isa, Darjeeling nung amenoker aliba political party tem dang parnok yongtsü nung rarabangsen masütsü ayongzük.

"K a n c h e n j u n g a menüremdar; tourism tenzükogo aser azütokshi kecha mali. Asenok ajak idak nungi tenzükter jajayonga odi," ta lai ashi.

Banerjee-i ashiba agi, lar party-i kaketshirtem nem credit card agütsüba nungi tenzükter ali makartem nem patta agütsüba tashi election mapang nangzükba ajak inyakogo. Laisa, iba tesem nung aliba süngolu nung inyakerter nema senotsü teyari agütsüogo, ta ashi.

Lai, Ukraine nungi India nunger kaketshir 17,000 meyipa aruba rongnung West Bengal nungi 400 liasü aser item kaketshirtem ya parnok course tembanga azüingtsü atema Centre-i jenjang tapet agitsüla ta ashi.

"West Bengal sorkari state nungi kaketshirtem nem iba amala facility agütsütsü atema inyaksü," ta lai ashi.



Lucknow, March 29 : Mongolbarnü Lucknow nung BJP lenir Satish Mahana-i Uttar Pradesh Legislative assembly speaker mapa agizükba mapang tangokba noksa nung angur.

Jaishankar-i Nepal aser Bhutan External Affairs Minister tem den ajurutep

New Delhi, Metsüremi/ March 29 (Agencies): External Affairs Minister S Jaishankar-i Mongolbarnü BIMSTEC Ministerial senden nung shilem agiba mapang Nepal aser Bhutan External Affairs Minister tem den ajurutepa connectivity, energy aser hydropower project tem nung tesendaktep atema sensaksemogo.

"BIMSTEC Ministerial senden nung adenba mapang Nepal nungi FM Narayan Khadka den ajurutepba atema pelar. Connectivity, energy, fertilizers, health and power dak sendakba nung tesendaktep atema sensaksemogo. Ramayan circuit tejkadangi

bener aotsü atema mulungtepogo," ta Jaishankar-i tweet asü.

Jaishankar, Mongolbarnü Colombo nung 18buba BIMSTEC Ministerial senden nung shilem agiogo aser ashiba agi, BIMSTEC züngsemtemi longjemer kiralongrar aser extremism tem den raratsü ayongzükba den connectivity, energy aser maritime dak sendakba nung tesendaktep atsülangshitsü atema India bendanga agütsür aliba lemsatepa liasü.

Paisa, Bhutan Foreign Minister den ajurutepa project aser inyakyim balala lepa reprangshia liasü.

(Maneni tapak 9 nung...)



Shanghai, March 29: March 28 nü Shanghai kübok Pudong District nung COVID-19 tashidak tendangba tesem nung Zhejiang Province nungi medical worker temi nüburttem dak nucleic acid tests agiba noksa nung angur. Kidanger Zhejiang province nungi tashidak tenangertem, yimti nung nucleic acid test agishiba nung teyari agütsüsi atema Hombarnü Shanghai-i oa liasü.

Israel PM Naftali Bennett-i India semdangtsü aliba thinen

Jerusalem, Metsüremi/March 29 (Agencies): Israel Ato Kilonser Naftali Bennett dak Covid tashidak potetba sülen anogo ka lir India semdangtsü aliba sentong thinenogo, ta India nung Israel Embassy otongdar Muhamed Heib-i Mongolbarnü ashi. Paisa, PM-i India semdangtsü asoshi tanga anogo ka latettsü, ta ashi. Bennett dak Hombarnü coronavirus tashidak potetba sülen pa indang office sangdong ka ajanga pa tema junga dang lir aser lokti nungi pilar kidang nungi dang maneni mapa inyakdar, ta metetdaksü. Ato Kilonser Narendra Modi-i jaokba sülen Israeli Ato Kilonser-i India semdangtsü

atema iba ita tetenzüklen sangdonga liasü. "Medemer Ato Kilonser Minister Modi-i jaokba sülen ni tang mezüngbuba officially India semdangtsü atema yongya atar. Küna longjemer linük ana tesendaktep atema maneni inyaksü," ta pai shia liasü. India semdangba mapang Bennett-i PM Modi aser tanga sorkar ketdangsürtem den ajuruteptsü liasü. Pa indang office ajanga ashiba agi, lenirtem tsüngda innovation, r o n g s e n k e t z ü n g , bushisüngdang, development, aluyimba aser tanga lenla aika nung tesendaktep akangshitsü atema sensak asemtsü liasü. Israel PMO sangdong ka ajanga ashiba agi, PM-i India

semdangba ya linük ana tsüngda tesendaktep akangshitsü aser bilateral tesendaktep atsülangshitsü atema liasü. Maneni Bennett-i India nung Yihuda nungertem den ajuruteptsü atema sentong yanglur liasü. India aser Israel na tsüngda 1992 küm tesendaktep yangluba sülen küm 30 ajungba mapa PM-i India semdangtsü liasü. Bennett-i Deobarnü Jerusalem nung Israeli aser Arab diplomats summit agiba mapang US secretary of state Antony Blinken ajuruogo. Kasa mapang nung Israel nung tang tashi nung nisung 3,876,122 dak covid tashidak potetogo aser iba tashidak agi nisung 10,485 süogo.

Bangladesh-i Rohingya camp nung school shibangtsü

Dhaka, Metsüremi/March 29 (Agencies): Rohingya refugee tem atema nija school tulutiba Bangladesh sorkari shibangtsüogo, ta ketdangsürtem ashi. Iba ajanga camp nung sabanga aliba tanur meyirejang aika kakat shisatsü bushiba nung tetsükdaksü adoktsü. 2017 küm Myanmar nungi jena aoba sülen Rohingya nunger refugee 850,000 shi Bangladesh tejenokdak agütsür lir. Taoba küm December ita nungi tenzüka Bangladesh nunger ketdangsürtemi Rohingya nungertem amenoker aliba school tem shibangja arudar aser taoba hopta parnoki Kayaphuri School shibangtsüogo. "Temelaba shidak magi-i tabi agi school tema lapoka inyaksangshi mesütettsü. Iba ya agizüktsü makok," ta Bangladesh sorkar kübok ketdangsür tejen kati ashi. Iba school ya Rohingya nunger nüngtugu lenir Mohib Ullah, shiba September ita tepseta liasü, pai lapokba school liasü. Iba nija school ya tesayur aser refugee tem rongnung ka ita alirtemi senotsü teyari agüja inyaksangshia liasü, kong kaketshir 600 shi liasü aser Myanmar nung sayuba kasa curriculum sayua liasü. Kaketshirtem kidangi künübo meyipa aotsü timla nung parnoki iba jenjang agi. Camp nung UNICEF-i school tem lapoka lir, ajisiüka parnoki

tanur arishi küm 4 nungi 14 tsüngda alirtem nem dang tangazükba agütsür aser ibayongji kaketshir taintem camp nung private school mesüra madrassa (tamangba yimsü sayudak) temi aotsüsa akümer. Human Rights Watch (HRW)-i taoba hopta ashiba agi, refugee temi lapokba school tem inyaksangshi masütsü atema tenokdangba agütsür aiba sülen manidakli süra refugee tem indang identity documents rakzüka ayutsü aser asetkong kati tashiyim agi anir aotsü atema Bangladesh sorkari amokmerendar. "Sorkari mezüng Rohingya nunger tanurtem angazüktsü atema tenokdangba agütsü aser tang Rohingya nungertem parnok atema lapokba school tem shibangtsürdar, iba den tesayur aser kaketshirtem tepuokdak mesükba asetkong kati yokdar," ta HRW nungi Bill Van Esveld-i ashi. Ajisiüka iba taitüsü ya ketdangsür kati aitsüogo aser ashiba agi, Bhasan Char asetkong yagi pei mulungka nung dang aoer. "Parnoki onok mapa nung teti aibelen dang reprangteter. Nisung mashi kati mashi tesem ka nung school ka lapoker tanurtem dang taa meshitsüji tim asü? Iba ya paperwork shidak inyakteperang benoka inyaksüla," ta ketdangsüri ashi.

Ukraine aser Russia na sensaksem tenzükogo

Istanbul, Metsüremi/March 29 (Agencies): Ukraine aser Russia nunger ketdangsürtem Mongolbarnü tejak o tejak na chitepa yimjung atema sensaksem tenzükogogo. Kasa mapang nung Ukraine nung Russia nunger sepaitemi atsünger aliba tesemtem nungi nüburttem anin tenzükogo. Sensaksem nung Turkey tir Recep Tayyip Erdogan-i shilem agidar. Taoba sensaksem mapang lenirtem nem miim chidaksü ta taoksatsü osang adoker aliba mapang ka nung iba sensaksem agidar. Erdogan-i, iba mepetmesü ya tembangdaksütsü atema ayongzükba den Dolmabahce Palace nung sensaksem metenzük tsüngda Russia aser Ukraine naprongla tebilemtsü lir ta ashi. Russia tir Vladimir Putin-i Ukraine amaksü tetuyuba agütsüba sülen ita ka dak tema maneni rara arudar. Iba rara ajanga nisung million 10 dak tema pei ki toktsür jena aotsüsa kümogo aser Ukraine tir Volodymyr Zelensky-i ashiba agi, iba rara nung nisung 20,000 shi süogo. Rara yimjung nung tembangtsüba mesüra telok kati rara koker anentsüba timla ramia kümdar. Ukraine nunger sepaitemi parnoki Irpin jila meyipa agiogo ta ashiba sülen Mongolbarnü AFP osangbenertem iba jila

nung bomb pokloktsüba angashiogo. "Jila shilem 70-80 ka maziüki alitsü südi aser jila tezülen Russia nungertem atsünger alitsü akok," ta Irpin nung alir Roman Kovalevskiy-i ashi. Kasa mapang nung Ukraine anolen tip len Russia-i atsünger aliba tesemtem nungi nüburttem anintsü atema sangdongogo. Anogo ka tejakdang humanitarian corridor nung Russia nungertem minprongtsü akok ta shia Ukraine nunger ketdangsürtemi nüburttem manine atatsü telemtetba agiba sülen Mongolbarnü nungi iba inyakyim tenzükogo. Wall Street Journal-i, iba ita tetenzüklen Kyiv nung sensaksemba mapang Russian oligarch Roman Abramovich aser Ukraine nunger sensaksemertem nem miim agütsü, ta sangdongba sülen Istanbul nung sensaksem tenzükogo. Abramovich aser sensaksemertem dak, tenük merema akümba aser teküp ajakba amala miim agütsüba temaitsütem adok, ajisiüka parnok anepogo, ta kasa sangdong ajanga metetdaksü. Zelensky-i ashiba agi, Abramovich-i parnok pusemtsü atema maongka agütsüba par sorkari agazüka liasü. Abramovich ya Putin den mapang talangka tesendaktep tajung nung arudar.

Ukraine-i miim agütsü ta taitüsüba agütsüba magizük aser Foreign Minister Dmytro Kuleba-i ashiba agi, Istanbul nung sensaksem ya humanitarian tensak dak rangloker sensak asemtsü. Pai iba sensaksem takok angutsü kangabo imlaa maliba ama jemiogogo. Mongolbarnü sensaksem nung Abramovich-a densema aliba, Turkey tir-i lemsatepba noksa nung nguogo. Putin-i, Ukraine demilitarize asütsü aser denazify asütsü khangogo aser iba den parnok kecha telok nunga shilem magitsü aser Donbas aser Crimea ya parnok meyong ta

joko ojang dang akhantsü khangogo. Kuleba-i ashiba agi, iba onük dak sendakba nung tangatetep ka dangi arutsü lenmang sademabo lapoka mali. "Onoki nisung, ali aser sovereignty shishilemba masür. Onok tamendakdak akang akanga lir," ta pai ashi. Raraba tesem nung telok anaprongla pei akokba tashi tejakdangi aotsü mulungteter lir. Ukraine ketdangsürtemi, Russia-i Kyiv atsüngtsü maneni merangdar ta amanger aser Kremlin-i Donbas tesem atsüngtsü asoshi rangloker inyakdar ta ashiba aitsüogo. Hombarnü Russia-i Kyiv

anasa tesem kar amak aser iba ajanga ki 80,000 dak tema electricity maka aküm, ta ketdangsürtemi ashi. Anütoktiplen Ukraine nunger sepaitemi telangzüba agüja radar ajisiüka Mariupol yimti maziükteti timtemba mapang ka lir. Russia nunger sepaitemi yimti mekütbanger lir aser iba ajanga yimti nung alir nisung 160,000 shi chiyongtsü, tajemtsü tzü aser mozü agi anünga kümdar. Ukraine ketdangsür tejen kati ashiba agi nisung 5,000 shi süogo, ajisiüka tasü mang bendenba sülenang asür nisung 10,000 shi asütsü.



Copenhagen, March 29 : March 28 nü Aalborg, Denmark nung green e-methanol vehicle ka tendangba mapang Denmark indang Minister for Transport Trine Bramsen (tabelen)-i shilem agiba noksa nung angur. Chinese company Geely-i, Aalborg nung Hombarnü nungi green e-methanol vehicles tendang tenzükogo.

Tuensang nung Mothers Group Meeting agi



Panchayat Hall St. John A' Colony, Tuensang kübok ayongba Mothers Group Meeting nung adenertem külemi tangokba noksa nung angur.

Tuensang, Metsüremi/ March 29, 2022 (TYO): Hombarnü, Panchayat Hall St. John A' Colony, Tuensang nung 'Mothers Group Meeting' agia liasü, ta sangdong ka ajanga metetdaksü.

Iba sentong nung District Coordinator, Poshan Abhiyaan, Thungpang menden

iasü. Akhangjongshi, JE PHED, Tuensang-i "Role of women in water conservation"; Dr. Wapangla CMO Office, Tuensang-i "Balance Diet and Nutritious Food for Lactating Mothers and Pregnant Women" aser Chulongla, Centre Administrator, One-Stop

Center Tuensang-i "Domestic Violence" onük nung ajemdaker jembio.

Kasa sentong nung mashisa alir tetsür aser tanur tetsü ajak nem chiyongsü lema agütsü. Iba sentong nung tajangzük angutsüpur 96 shi denogo, ta kasa sangdong ajanga ashi.

Padma Awards 2022: Sonu Nigam-i Padma Shri Award angur



New Delhi, Metsüremi/ March 29, 2022 (Agencies): 2022 küm Arts category kübok Padma Shri aser Padma Bhushan Awards angur nisung 35 rongnung Bollywood singer Sonu Nigam aser Bengali actor tejen Victor Banerjee na dena liasü.

Hindi Cinema tsütsü Sonu Nigam ya nüngtugu aser takok tajung angur playback singer ka asütsü aser 2003 küm sayaba romantic film 'Kal Ho Naa Ho' indang title track atema National

Film Award densema pai award balala ngua lir.

Nigam-i Hindi aser Kannada film timba nung ken tena lir, saka oshi ana dak alaka pai Odia, Bengali, Gujarati, Tamil, Telugu, Marathi, Nepali, Malayalam, Kannada, Bhojpuri aser tanga India oshi nung ken balala atenba ajaki jangjaa lir.

Iba sentong nung Sonu Nigam dak alia, Marathi kentener Sulochana Chavan, Madhuri Barthwal, musician Balleesh Bhajantri aser film

yanglur Chandraprakash Dwivedi nungeri Padma Shri Award nguogo.

Hombarnü, Rashtrapati Bhavan kübok Civil Investiture Ceremony-II nung Tir, Ram Nath Kovind-i Padma award agüja liasü.

Taküm, Padma Award angur rongnung Padma Vibhushan 4, Padma Bhushan 17 aser Padma Shri Awards 107 dena lir. Award angur rongnung tetsür 34 dena lir aser Foreigners/NRI/PIO/OCI indang category nungi nisung 10 aser Posthumous award 13 dena lir.

Padma Awards ya India nung civilian honours tematiba asütsü, koba küm shia Republic Day atongtsü anogo ka lia sangdonger. Iba Award ya category asem - Padma Vibhushan (for exceptional and distinguished service), Padma Bhushan (distinguished service of higher-order) aser Padma Shri (distinguished service) nung lemsar agütsür.

Menungra Bilemteter



Kotanga mamatetba temeim asür **P. Lanumeri Longkumer** Chuchuyimlang. Na Iba lima toktsür tanü küm ka ajungba anogo nung onoki na menungra bilemteter

Temeim kinungtsü, chirnur, aser semchirtem

FOR SALE

Prime land for sale in Kuhuboto town. Both side of two lane road 6kms from Dubagaon village main gate. Area 17 bighas to be sold in bulk.

Rate 70per sq feet.

Contact no : 9612247917



Phek, Metsüremi/March 29, 2022: Phek Town nung plastic juli/ yangkhu amshitsü melen PTYS, PTCU, PTC aser PDCCI den Plastic & Hygiene Police, Phek longjemer yimdong nung yokji-yokjar nem waküp (bamboo culm sheath) agi yangluba pungdangtem lema agütsüba noksa nung angur.



Mokokchung, Metsüremi/March 29, 2022: Mongolbarnü IMDH Mokokchung nung matamabensar tem atema Medical Assessment Camp ayongzükba mapang tangokba noksa nung angur. Iba camp ya IMDH Mokokchung den Department of Social Welfare longjemer ayongzuka liasü.

Jaishankar-i Nepal aser... (Tapak 7 nungi...)

"@FMBhutan den Colombo nung 18buba ajurutepeba atema pellar. BIMSTEC Ministerial senden Hydropower sector nung amenba mapang ajurutepogo. mapang talangka nungi PM-i India semdangtsü aliba sendaktepa inyaka aruba densema onük balala benoka sensaksemogo," ta tweet asü.

Project aser maparen Jaishankar, Hombarnü balala lepa reprangshia sensaksemogo. India kübok training institution tem nung sensaksemogo. Sri lanka tang sempet aketba Bhutan nung rongsenketzüung nung timtem kaketshirtem ni ajuruba indang tulu adoker aliba mesemtsü jembio. Maneni tesendaktep atema India-i rongsenketzüung tajung nung inyakyonga aotsü nung teyari agütsüba sülen pai imlaa atar," ta pai tweet asü.

Kasa mapang nung Nepal aserkong semdangogo. Foreign Ministry-i, "Foreign India aser Sri Lanka na Minister Hon. Dr. Narayan den BIMSTEC nung Khadka-i, India indang Bangladesh, Myanmar, External Affairs Minister Thailand, Nepal aser Bhutan @DrSJaishankar den densema lir.

7buba Frolic Cup 2022 asayamung osang



Dimapur, Metsüremi/March 29, 2022 (TYO):

Mongolbarnü, Local Ground, Medziphema kübok ayongba 7th Frolic Cup football asayamung mezüing match nung Kuki Youth Club aser Ton FC tsüingda asaya liasü. Iba match nung Kuki Youth Club-goal 3-0 agi Ton FC tsükdaktsü.

Team ana tsüingda asaya tenzüker minute 5buba nung KYC atema Shürhuosul-i mezüing goal idaktsü. KYC goal 1-0 agi Ton FC tejakdang ser mezüing half tembang.

Break sülen tanabuba half nung, KYC atema Thanglunhao aser Lamginmang nati minute 65buba aser 71buba nung goal tanabuba aser tasembuba idakja liasü. KYC-i Ton FC madak goal 3-0 agi takok angu.

Kasa anogo tanabuba match nung, iba asayamung quarter final tongtetsü atema Patkai Christian College-i goal 2-1 agi St. Joseph University tsükdaktsü.

Iba match tenzüker minute 14buba nung Longngai C Phom-i St. Joseph University team atema mezüing goal idaktsü.

Ajisüaka, Patkai team-ia maongka tajung ngua minute 22buba nung Monton-i goal ka idakja liasü. Team anapronglai goal 1-1 idaktsür lia mezüing half tembangadok.

Break sülen, tanabuba half tenzüker minute 2buba nung Menguneizo-i goal ka inoktsüba mapang Patkai pur goal 2-1 agi St. Joseph tejakdang kümadok. Asaya dak mapet yimya beshiba atema St. Joseph nungi asayar Bepeto nem yellow card agütsü. Patkai-i St Joseph University madak goal 2-1 agi takok angu.

Match tasembuba nung, Tribal FC-i goal 3-1 agi The Beakons tsükdaktsüba sülen, Tribal pur quarter final tongogo.

Iba match nung Tribals FC atema Ngulie (31min)-i goal ka aser Kuthozo (53 & 68min)-i goal ana idaktsü. Kasa match nung Kekruzeliie Watsah

(50min)-i Beakons atema goal 1 inoktsü.

Maneni, Paohao Memorial FC puri goal 3-2 agi Medziphema Village Youth Organization tsükdaktsü. Iba asaya nung Aloumei (9min), Ngulgoulal (16min) aser Awang (59 min) nungeri Paohao Memorial FC atema goal ka ka idaktsü. Kasa match nung, Medziphema Village Youth Organization atema Thejaseto (33 min) aser Vikhole (66min) nati goal ka ka idakja liasü.

Asaya dak mapet yimya beshiba atema Ako Cüsotsu aser Kelezhatuo (MVYO) aser Haohen (PMFC) nunger nem yellow card agütsü.

*** March 30, 2022 nü asayatem yamai alitsü:**

- Raven FC vs Ukigei FC (07:30 am)
- 1st Quarter Final: Amigos FC vs Patkai Christian College (01:30 pm)
- 2nd Quarter final: United Falcon Club Junior vs Paohao Memorila FC (03:00 pm)

Nigeria nung kiralongrar temi... (Tapak 5 nungi...)

"Fulani ket nung prangbong aser nok ama hadir lir aser parnoki Katsina-Ala Local Government Area nung aliba Yoyo tesem amak. Parnoki yangji nisung asem tepset aser aika yimtsüing nungi jena aotsüsa akum," ta nisung kati ashi.

Iba yimtsüing nung Khristanpur asem tepsetba ya Universal Reformed Christian Church (NKST in Nigeria) nung züingsem liasü, ta ashi.

Katsina-Ala Local Government Area kübok local council ketdangsur Alfred Atera-ia March 24 nü sangdong ka nung Khristanpur asem tepsetba indang shia liasü.

Benue state nunga shiruru metsürtemi iba ita lendong agüja liasü. Guma County nung shiruru metsürtemi March 10-12 anogotem Ahentse yimtsüing maka Khristanpur pungo tepseta liasü.

March 10 nü Iye yimtsüing nung shiruru metsürtemi Khristanpur ti tepset aser kasa

anogo Udeyen yimtsüing nunga nisung trok tepseta liasü. Iba lendong matalokdang yimdaklirtem iba yimtsüing yutsür ainshitsüla, aji mesüra tepsettsü, ta shiruru metsürtemi amokmeren shidi ka zülua liasü.

Benue Governor Samuel Ortom-ia March 14 nü shiruru metsürtemi ita tenzüker hopta ana tsüingta nisung 20 dak tema tepset, ta shia liasü.

"Taoba hopta ana tsüingta Guma, Logo and Gwer West, Agatu tesemtem nung Fulani kiralongrar temi nisung 20 dak tema tepsetogo. Iba yongji Benue nung IDPs [Internally Displaced People] tali akumer. Tang ya nisung million 1.5 dak tema tesem balala nung jenoka lir. Parnok taolen maka," ta pai ashi.

Gwer West County nung 2011 küm nungi tenzüka shiruru metsürtemi nisung 390 tepsetogo aser 37 yirutsü. Anungji yangji aliba Khristanpur tem pei ki yutsür jena ao, ta

yangji aliba lenir kati ashi.

Nigeria aser Sahel nung Muslin Fulani nütsüing million aika lir aser parnok ya kidong noklang aika lir aser kari Islamist tesayuba arok-aroka agizüker, ta United Kingdom indang All-Party Parliamentary Group for International Freedom or Belief (APPG) ajanga ashi.

Taoba küm (Oct. 1, 2020 nungi Sept. 30, 2021) alima nung tamangba yimsü mechi Khristanpur tepsetba timtiba ya Nigeria nung liasü, kong nisung 4,650 tepset, ta Open Doors' 2022 World Watch List ajanga ashi.

Kasa mapang Khristanpur pua bener aoba Nigeria nung timba liasü (2,500 dak tema).

Alima nung Khristanpur alitsü asoshi tasaktiba linüktem rongnung Nigeria ya jenjang 7 buba nung lir, koba taoba küm jenjang 9 buba nung liasü, ta 2022 World Watch List nung shia lir.

India tetsür football team Jordan den Friendly 2 asayatsü

Metsüremi/March 29, 2022

(Agencies): India tetsür senior national team Egypt aser Jordan na den friendly ana asayatsü. Asaya anaprongla ya Jordan nung April 5 aser 8 nü asayatsü.

Friendly ana asayaba sülen team nung züingsem taruba Indian Women's League (IWL) season atema pei club nung oa adentsü, koba April 15 nü tenzüktü.

Head coach Thomas Dennerby kübok asaya 30 agi kümteba squad ka March 28 nü nungi tenzüka Goa nung training camp ka nung shilem agidar. India team April 2 nü Jordan-i aotsü.

Taoba hopta Jamshedpur nung SAFF U-18 Women's Championship akokba sülen Head coach Thomas Dennerby den Astam Oraon, Apurna Narzary aser Martina Thokchom nunger camp nung denogo.

Asava mapanglem:

April 5, 2022: India vs Egypt
April 8, 2022: Jordan vs India

Camp atema shimba

asayatem:

GOALKEEPERS: Aditi Chauhan, Linthoingambi Devi, Shreya Hooda, Sowmiya Narayanasamy.

DEFENDERS: Dalima Chhibber, Sweety Devi, Ritu Rani, Ashalata Devi, Ranjana Chanu, Manisa Panna, Astam Oraon, Kritina Devi.

MIDFIELDERS: Anju Tamang, Sandhiya Ranganathan, Karthika Angamuthu, Ratanbala Devi, Priyanka Devi, Kashmina, Indumathi Kathiresan, Sanju, Martina Thokchom, Sumithra Kamaraj.

FORWARDS: Apurna Narzary, Grace Dangmei, Soumya Guguloth, Manisha, Pyari Xaxa, Renu, Karishma Shirvoikar, Mariyammal Balamurugan.

NBA-i Dr. Watizulu Süzümeren Jamir nem tenüingsang agütsür



Dimapur, Metsüremi/ March 29, 2022 (TYO):

Taoba mapang Dr. Watizulu ya BAI indang Joint Secretary liasü. Dr. Watizulu dak temulung lemtetta pa nem iba mapa nüngloksüba atema NBA-i BAI dang pelaba metetdaksü. Team tasen nung pa anisemba ajanga State nung asayatem aser iba saisapong meimertem kanga ajungmesotsü imlar. Nagaland nung Badminton saisapong tsütsü pai shilem tulu agia achaayanga inyaktsü, aser pa mapa nung takok angutsü asoshi imlar, ta kasa sangdong ajanga metetdaksü.

BILEMDANGANG

"Tesüingjem mulungsentsü agi alizüing tongtetter."